

- प्रदेश मांय जोरदार तावड़ा ऊं जिंदगी माथे असर पड़यो— जोधपुर अर बीकानेर संभाग मांय केई ठोड़ा अधिकतम तापमान 45 डिग्री सेल्सियस ने पार कीनो।
- बाड़मेर लोकसभा हलका मांय दुधवा खुर्द गांव रा मतदान केन्द्र माथे आज ओजू वोट पड़्या—67 दशमलव 07 फीसदी मतदाता वोट देवण रो हक इस्तेमाल कीनो।
- प्रदेश मांय चिकित्सा विभाग री ओर ऊं काल खास जांच अर जागरूकता अभियान चलायो जावेला।
- एयर इंडिया एक्सप्रेस रा क्रू मेंबर्स रे औचक ई छुट्टी ले लेवण ऊं जयपुर हवाई अड़ा माथे ई हवाई जहाजां री आवण जावण माथे असर पड़यो।

000

प्रदेश मांय पड़ रह्या जोरदार तावड़ा रे कारण जिंदगी माथे घणो असर पड़ रह्यो है। आज जोधपुर अर बीकानेर संभाग मांय कठे—कठे लू रा हालात रह्या जठे पारो 45 डिग्री सेल्सियस ने पार कर ग्यो। बाड़मेर अर जैसलमेर जिलां मांय पड़ रह्या जोरदार तावड़ा रे कारण सड़कां सूनी निजर आयी।

जयपुर, भरतपुर अर कोटा संभाग मांय ई कठे—कठे दिन मांय तापमान 44 ऊं 45 डिग्री सेल्सियस रे आरे—सारे दर्ज करी ज्यो। राजधानी जयपुर मांय ई तेज गर्मी रे कारण लोगां ने परेशानी व्ही। मौसम केंद्र जयपुर रा निदेशक राधेश्याम शर्मा बतायो के प्रदेश मांय काल ई जोरदार गर्मी रेहवण रा आसार है।

ई बीचे जोरदार तावड़ा ने ध्यान राखता थकां करौली मांय जिला कलेक्टर 8वीं कक्षा ताँई रा विद्यार्थियां सारू काल ऊं 11 मई ताँई छुट्टी रो ऐलाण कर दीनो है, जदके 9वीं ऊं 12वीं कक्षा रा विद्यार्थियां सारू स्कूल रो टेम संवारे साढे ग्यारह बज्यां ताँई रो करण रा हुकम दीना है। भरतपुर मांय ई 8वीं कक्षा ताँई रा विद्यार्थियां सारू काल ऊं 11 मई ताँई छुट्टी रो ऐलाण कर दियो ज्यो है। बाड़मेर मांय ई 8 वीं कक्षा रा विद्यार्थियां सारू 10 मई ताँई छुट्टी रो ऐलाण कर दियो ज्यो है। झुंझुनूं मांय जिला कलेक्टर काल ऊं आठवीं कक्षा ताँई रा विद्यार्थियां सारू स्कूल रो टेम संवारे साढे सात ऊं 11 बज्यां ताँई करण रा हुकम दीना है। कोटा रा जिला कलेक्टर 8वीं कक्षा ताँई रा विद्यार्थियां सारू स्कूल रो टेम संवारे साढे सात ऊं 11 बज्यां ताँई करण रा हुकम दीना है। नागौर मांय ई 8वीं कक्षा ताँई रा विद्यार्थियां सारू स्कूलों रो टेम संवारे 7 ऊं 10 बज्यां ताँई कर दियो ज्यो है। बीकानेर मांय जिला कलेक्टर 12वीं कक्षा ताँई रा विद्यार्थियां सारू स्कूल 12 बज्यां ताँई ई चलावण रा हुकम दीना है। शाहपुरा जिला मांय ई 8वीं कक्षा ताँई रा बच्चां सारू स्कूल रो टेम संवारे साढे सात ऊं साढे 10 बज्यां ताँई कर दियो ज्यो है। भीलवाड़ा मांय 8 वीं कक्षा ताँई रा बच्चां सारू स्कूल रो टेम संवारे साढे 7 ऊं साढे 11 बज्यां ताँई कर दियो ज्यो है। चूरू मांय तेज तावड़ा रा हालात ने ध्यान राखता थकां जिला कलेक्टर बोझो ढोवण वाढा ढांढां ऊं संवारे 11 बज्यां ऊं दोपहरां पाछे तीन बज्यां ताँई काम नी करावण रा हुकम दीना है। ई बीचे कोटा मांय संभागीय आयुक्त उर्मिला राजोरिया आज “एक व्यक्ति एक पेड़” अभियान री सरुआत कीनी। वे सीएडी परिसर मांय पौधा रोप र जनता ऊं पौधा रोप र वां री सार—संभाल करण री अपील कीनी। भीलवाड़ा रा अस्पताल परिसर मांय आज बुजुर्गा री ओर ऊं परिंदां सारू परिंडा बांधी ज्या। टोंक जिला रा अविकानगर री सरकारी स्कूल मांय अध्यापक परिंदां सारू दाणा—पाणी री व्यवस्था करण बाबत् परिंडा बांध्या अर वां री सार संभाल रो संकल्प लीनो। झालावाड़ मांय न्यारी—न्यारी ठोड़ा 11 हजार 400 परिंडा बांधी ज्या। जैसलमेर अर झालावाड़ मांय प्रशासन जनता ऊं गर्मी ऊं बचाव सारू सावचेती राखण अर ढांढा—ढोरां री सार—संभाल

करण बाबत् एडवाइजरी जारी कीनी है। झालावाड रा जिला कलेक्टर अजय सिंह राठौड़ जनता ऊं तेज़ धूप अर लू ऊं बचबा री अपील कीनी है।

टोंक अर उदयपुर मांय ई ज़ोरदार तावड़ा रे कारण घणी परेशानी व्ही। तेज़ गर्मी रे कारण साबरमती एक्सप्रेस रेलगाड़ी रा एक डिब्बा रा पेड़ा ऊं धुंओ निकळबा रे कारण आ गाड़ी 15 मिनट तांई दौसा जिला रा भांकरी टेशन माथे ऊबी रही। रेलवे रा मुख्य जनसंपर्क अधिकारी शशिकिरण बतायो के आग बुझायां पाछे ई गाड़ी ने रवाना कर दीरीजी।

00000

बाड़मेर लोकसभा हलका मांय चौहटन विधानसभा हलका रा दूधवा खुर्द मतदान केन्द्र माथे लोकसभा चुनाव सारू आज ओजू वोट पड़्या। वोट देवण वाढ़ा मोठी तादाद मांय शांति सागे वोट दीना। आखिरी समाचार मिलण तांई सिंज्या 5 बज्यां तांई 67 दशमलव 07 फीसदी मतदाता वोट देवण रो हक इस्तेमाल कर लीनो हो। ई मतदान केन्द्र माथे नाम मंडायोड़ा 1 हजार 294 मतदातावां मांय ऊं 8 सौ 68 मतदाता वोट दे दीना हा। पोलिंग बूथ पर वेबकार्टिंग की गई तथा मतदान के बाद निर्वाचन सामग्री बाड़मेर के राजकीय स्नातकोत्तर महाविद्यालय में बनाये गये स्ट्रॉग रूम में पहुंचा दी गई है।

000000

राज्यपाल कलराज मिश्र आज नई दिल्ली मांय राष्ट्रपति द्वौपदी मुर्मू सागे मुलाकात कीनी। वे भारत रत्न ऊं नवाजी ज्या पैली वाढ़ा उप प्रधानमंत्री लालकृष्ण आडवाणी सागे ई वां रा रहवास माथे मुलाकात कीनी। राज्यपाल आडवाणी रा स्वास्थ्य री जाणकारी ले र वां रे लम्बा अर स्वस्थ्य जीवन री कामना कीनी।

0000

पाली ऊं हज रा मुकद्दस सफर माथे जावण वाढ़ां रे टीका लगावण अर वां ने दूजी जाणकारियां देवण रा मकसद ऊं आज मुस्लिम मुसाफिर खाना मांय शिविर लगायी ज्यो। पाली जिला ऊं ई साल हज सारू जावण बाबत् 80 जणा चुणी ज्या है।

000

मायड़ां अर टाबरां रा स्वास्थ्य समेत न्यारी—न्यारी चिकित्सा सेवावां ने मज़बूत बणावण सारू राज्य मांय काल खास निरीक्षण अर जागरूकता अभियान चलायो जावेला। अभियान रा तहत अस्पतालां मांय जच्चा—बच्चा रा स्वास्थ्य ऊं जुड़्या सुबीतां, मौसमी बीमारियां, लू अर गर्मी रे कारण व्हेवण वाढ़ी बीमारियां रा प्रबंधन री जांच करी जावेला। विभाग की अतिरिक्त मुख्य सचिव शुभ्रा सिंह ने बताया कि कल प्रधानमंत्री सुरक्षित मातृत्व अभियान दिवस और मातृ शिशु स्वास्थ्य पोषण दिवस एक साथ हैं। इस अवसर पर विभाग की ओर से मातृ और शिशु स्वास्थ्य को लेकर आमजन को जागरूक भी किया जाएगा। श्रीमती सिंह ने बताया कि इसके तहत 27 आकांक्षी ब्लॉक का विशेष निरीक्षण करने के लिए राज्य स्तर से टीमों का गठन किया गया है।

00000

खून मांय हीमोग्लोबिन री कमी री बीमारी थैलेसीमिया रा बारा मांय जाग जगावण सारू हर साल 8 मई ने थैलेसीमिया दिवस मनायो जावे है। ई साल ई री थीम एम्पावरिंग लाइक्स, एम्ब्रेसिंग प्रोग्रेस: इक्वीटेबल एण्ड एक्सीसेबल थैलेसीमिया ट्रीटमेंट फॉर ऑल राख्यी ज्यी है। ई मौके अलवर मांय 40 न्हाना बच्चावां री सीबीसी, फेरेटीन, एलएफटी, टीएफटी री मुफ्त जांच करी ज्यी।

00000

जोधपुर रा अखिल भारतीय आयुर्विज्ञान संस्थान—एम्स मांय एंटी नेटल जांच रो सुबीतो सल करी ज्यो है। इण मांय पेट मांय पळ रह्या बाल्क मांय थैलेसीमिया समेत एक ऊं दूजी पीढ़ी मांय व्हेवण वाढ़ी बीमारियां री ठा करी जा सके है। हाल तांई थैलेसीमिया री बीमारी वाढ़ा करीब 50 बच्चावां रा मां—बाप आ जांच करायी, ज्यां मांय ऊं 30 जोड़ा ने फायदो मिल्यो है। थैलेसीमिया बीमारी रे कारण खून मांय हीमोग्लोबिन पूरो नी बणे है अर शरीर मांय ऑक्सीजन री कमी व्हे जावे है।

00000

अंतर्राष्ट्रीय रेड क्रॉस दिवस रे मौके आज प्रदेश मांय न्यारा—न्यारा कार्यक्रम राख्यी ज्या। डूँगरपुर मांय देहदान करण रो संकल्प लेवण वाळा 20 जणा अर खूनदान करण वाळा रो मान करी ज्यो। बूंदी रा अस्पताल मांय 4 व्हील चेयर भेंट करी ज्यी अर मरीजां ने ग्लूकोज अर बिस्कुट रा पुड़का दे र वां रे बेगा ठीक व्हेवण री कामना करी ज्यी।

चूरु मांय सरकारी अस्पताल मांय भर्ती मरीजां ने जिला कलेक्टर पुष्टा सत्यानी री अगुवाई मांय फल बांटी ज्या। अजमेर मांय ई खास कार्यक्रम राख्यी ज्यो।

00000

विश्व अस्थमा दिवस रा सिलसिला मांय कोटा रा मण्डल रेल चिकित्सालय री ओर ऊं संगोष्ठी राख्यी ज्यी अर स्वास्थ्य जांच रो शिविर लगायी ज्यो। शिविर मांय 61 कर्मचारियां रा फेकडां री जाँच कर र जरूरी राय दीरीजी।

00000

एयर इंडिया एक्सप्रेस रा हवाई जहाज उडावण वाळां रे औचक ई छुट्टी माथे जावण रे कारण देश रा न्यारा—न्यारा हवाई अड्डां समेत जयपुर हवाई अड्डा ऊं आवण—जावण वाळी उडानां माथे ई असर पड्यो है। आज दिल्ली ऊं जयपुर आवण वाळी अर जयपुर ऊं दिल्ली जावण वाळी दो उडानां रद्द कर दीरीजी। एयर इंडिया एक्सप्रेस री जयपुर ऊं हैदराबाद अर बैंगलुरु जावण अर वठे ऊं आवण वाळी आठ उडानां ई आवता सात दिन सारु निलम्बित कर दीरीजी है।

00000

करौली जिला मांय बरखेडा नदी रा पुल माथे मोटरसाईकिल अर जीप री टक्कर मांय एक जणा री मौत व्हे ग्यी। हादसा मांय एक जणो घणो ज़ख्मी व्हे ग्यो। टोंक जिला रा टोडारायसिंह मांय एक कॉलेज बस उत्तरण री बगत पड़ जावण ऊं एक टाबरी री मौत व्हे ग्यी।

हनुमानगढ टाउन मांय भारत माला रोड माथे दो ट्रकां री टक्कर रे कारण लाय लाग जावण ऊं एक ट्रक रो ड्राइवर जीवतो बळ ग्यो जद के दूजी ट्रक रो ड्राइवर ज़ख्मी व्हे ग्यो।

000000

दौसा री सरकारी स्कूल मांय आज पुलिस मोक ड्रिल कीनी। ई रा तैत स्कूल मांय हथियारबंद आतंकियां कानी ऊं बच्चां ने बंधक बणावण री सूचना परां कार्रवाई करी ज्यी। कार्रवाई रे दौरान पुलिस नकाबपोश आतंकवादियां ने दबोच लीना। इण ऊं पैली स्कूल मांय आतंकवादी व्हेवण री ठा पड़्यां पाछे अफरा—तफरी मच ग्यी, पण मोक ड्रिल री जाणकारी मिलण परां लोगां ने साता मिली।

00000

कोटा री सरकारी स्कूलां मांय बत्ता ऊं बत्ता विद्यार्थियां रा नाम मंडावण सारु इटावा ब्लॉक रा अयाना री महात्मा गांधी इंग्लिश मीडियम स्कूल रा अध्यापक एक वीडियो बणायो है। 2 मिनट रा ई वीडियो मांय सरकारी स्कूलां री खासियत री जाणकारी दीरीजी है। वीडियो मांय स्कूल रा अध्यापक दाखिला सारु बेटी ने ले र आवण वाळी महिला ने चार्ट रे जरिये सरकारी स्कूलां री उपलब्धियां अर गैर—सरकारी स्कूलां री तुलना कर र बता रह्या है।

000000